

## 2 KOLINTU

### Ini Sa Keduwa Igsulat I Pabelo Diyà Sa Umpungan I Hésus Diyà Menuwa Kolintu

#### Ini Denu Sa Libelu 2 Kolintu

*Na, ini sa keduwa di gulê migsulat Pabelo i diyà sa medoo etaw epgigtuu diyà si Hésus Kelistu dutu menuwa Kolintu dò. Segepalay dé kéen sa lugay di kedu sa egoh di anay migsulat diyà kenagda. Egoh di migsulat ini i, dutu uwang Masidoniya dò Pabelo i.*

*Egoh di migpeuwit sa muna igsulat di, nebukul Pabelo i enù ka endà metuuwan kéen sa medoo tegeKolintu diyà sa kagi di igsulat dahiya. Endà ma netiigan di duu amuk migpangunut da diyà sa igtulù di ataw ka egbulit da danà di mig-indaw kenagda diyà sa sulat di. Huenan di, sinugù i Pabelo Tito i anè mangay tumelow kenagda anè metiigan di sa pedu da egoh da migsakem sa sulat di. Egoh i Pabelo pelà diyà sa uwang Masidoniya, migtebow Tito i owoy migtulon denu sa medoo etaw epgigtuu dutu Kolintu dò. Tinulon di ma netuuwan da gaa diyà sa sulat i Pabelo owoy migpangunut da ma diyà sa igtulù di. Dodoo duen ma doo etaw migsumbang kenagdi guwaen da beken salu i Hésus Kelistu Pabelo ya.*

*Huenan di, migsulat dema Pabelo i diyà kenagda, owoy ini sa sulat di. Migtulon dahini denu sa langun nebaelan di anè ipetiig di diyà kenagda kagdi sa tigtu salu i Hésus. Tinulon di ma sa egoh di migtigkel sa kelikutan di owoy sa lihay di danà di egbael sa igpebael i Nemula diyà kenagdi. Metiigan ta ma diyà siini sulat di sa kedakel kehidu i Pabelo diyà sa medoo etaw tegeKolintu, owoy duen ma sa medoo liyu igtulù di dahini.*

*Na, si Tito sa mig-uwit siini sulat diyà Kolintu owoy duen ma duma di.*

#### Ini Sa Edungan Kagi I Pabelo

#### Diyà Sa Medoo TegeKolintu

**1** *Na, si Pabelo a egsulat ini i owoy si Timotiyu, sa duma ta epgigtuu. Aken sa salu i Hésus Kelistu danà sa ungayà i*

*Nemula. Egsulat ké diyà kiyu i umpungan i Nemula dutu menuwa Kolintu dò, taman sa langun etaw i Nemula diyà sa uwang Akaya.*

<sup>2</sup>Egsimbà ké anì mekehaa yu sa mepion ketabang ipeuloy i Nemula owoy sa melanìh keugpà yu danà sa Emà ta si Nemula owoy si Datù Hésus Kelistu ma.

**Ini Sa Keolò I Pabelo  
Si Nemula**

<sup>3</sup>Meolò Nemula i, sa Emà i Hésus Kelistu sa Datù ta. Kagdi sa Emà ta mehidu kenita, owoy sa keduwan sa langun egpeketabang diyà kenita. <sup>4</sup>Egtabangan di kami diyà sa langun kelikutan ké anì meketabang ké ma sa medoo liyu etaw, sumalà dé sa kelikutan da. Meketabang ké kenagda danà sa ketabang i Nemula kenami. <sup>5</sup>Apiya di pa dakel sa kepelelahan ké danà ké nesesebaen si Kelistu, dakel ma doo sa ketabang i Nemula kenami danà i Kelistu. <sup>6</sup>Iya sa pesuwan di egkepelelahan ké anì pebagelen ké sa pedu yu anì mealukan yu ma. Hediya ma, amuk egtabangan i Nemula kami, metabangan yu ma owoy kumebagel sa pedu yu anì metigkelan yu sa kepelelahan yu lagà mendaa sa nami neukitan. <sup>7</sup>Huenan di, endà egkeduwa sa pedu ké denu keniyu, enù ka netiigan ké amuk egkepelelahan yu lagà mendaa sa egoh ké ma nepelihay, metabangan i Nemula ma doo kiyu lagà mendaa sa ketabang di kenami.

<sup>8</sup>Na, o medoo duma ké egpigtuu, ungayà ké metulengan yu sa kelikutan neukitan ké egoh ké pelà dutu uwang Asiya dò. Tigtu dakel temù sa kelikutan ké egoh iya, owoy buyu ké dé endà meketigkel, huenan di guwaen ké dò mematay ké dé. <sup>9</sup>Iya sa penemdem ké mekesugsug ké. Iya sa pesuwan di neukitan ké iya wé anì endà sumalig ké diyà sa nami egkegaga, dodoo sumalig ké polo diyà si Nemula, sa egpekeenaw etaw nematay. <sup>10</sup>Inalukan di kami, huenan di endà nematay ké. Netiigan ké alukan di kami, huenan di dakel sa kesalig ké kenagdi anì alukan di kami takà. <sup>11</sup>Dodoo mepion amuk tabangan yu kami isimbà diyà si Nemula, enù ka amuk medoo yu egsimbà denu kenami, tigtu tabangan i Nemula kami owoy medoo ma sa umolò kenagdi danà sa ketabang di kenami.

**Ini Sa Pesuwan Di Endà Neketuu  
Sa Ungayà I Pabelo**

<sup>12</sup>Na, ini sa ipeolòlò ké, enù ka netiigan ké tigtu mepion sa adat ké diyà sa langun etaw, labi pa diyà keniyu, enù ka metiengaw sa egbaelan ké owoy tigtu metudà ma sa pedu ké. Beken danà sa egkegaga etaw daa iya wé egbaelan ké, dodoo egsalig ké polo diyà sa dakel ketabang i Nemula kenami. <sup>13,14</sup>Igsulat ké daa diyà keniyu

sa mebasa yu owoy sa metiigan yu ma. Dodoo apiya di pa endà netiigan yu duu sa langun denu kenami, ungayà ku tigtu yu meketiig langun anì meanggan yu diyà kenami lagà sa nami keanggan denu keniyu amuk meuma sa agdaw sa kepelikù i Datù Hésus.

15Na, danà ku neketiig metiigan yu langun iya wé, huenan di iya sa anay penemdem ku lumengen a diyà keniyu anì tabangan ku kiyu dema. 16Enù ka iya sa penemdem ku tumuluy a umukit diyan amuk mangay a Masidoniya dò, agulé amuk pelikù a dema umukit a diyan anì tabangan yu aken mangay uwang Hudiya dò. 17Dodoo, apiya di pa endà neketuu di iya wé ungayà ku mangay diyan, endà doo mehalihalì sa pedu ku mangay diyan, enù ka endà iling a sa liyu etaw endà kesaligan owoy egkehalihalì sa penemdem da. 18Dodoo endà hediya di aken i, enù ka amuk kesaligan Nemula i, kesaligan a ma doo, owoy endà ma egbutbut a diyà keniyu. Endà ig-amut ku duu sa butbut diyà sa tuu kagi. 19Enù ka tigtu kesaligan Hésus Kelistu i Anak i Nemula, sa igtulù ké si Silas owoy si Timotiyu. Endà egkehalihalì di, dodoo ipetuu di polo sa igpasad di 20enù ka danà i Hésus Kelistu, meketuu doo sa langun igpasad i

Nemula. Huenan di, mikagi ki sa tuu daa danà i Hésus anì meolò ma Nemula i. 21Na, si Nemula sa egtabang kenami lapeg keniyu ma anì kumeeles sa kepigtuu ta diyà si Kelistu. Kagdi sa mighemilì kenita, 22owoy pineugpà di sa Metiengaw Suguy di diyà sa pedu ta anì metandaan kita sa etaw di sumakem sa langun igpasad di diyà kenita.

23Na, tigtu netiigan i Nemula sa pesuwan di endà nekeangay a diyà Kolintu anì endà meumanan sa bukul yu danà ku egbulit keniyu. 24Beken iya sa uyot ké amuk tegelen ké sa kepigtuu yu, enù ka netiigan ké meeles doo sa kepigtuu yu. Dodoo iya polo sa ungayà ké tabangan ké kiyu anì meumanan sa keanggan yu.

**2** 1Huenan di, iya sa penemdem ku endà pa mangay a diyan anì endà mebukul yu danà ku eghawid keniyu iling sa egoh ku anay mig-angay diyan. 2Upama, amuk mebukul yu danà sa kehawid ku sa medaet egbaelan yu, ngadan di etaw sa egpepion sa pedu ku? Endà duen di, enù ka mebukul yu polo langun. 3Ini sa pesuwan di igsulat ku diyà keniyu egoh anay anì pepionen yu sa egbaelan yu anì endà mebukul a amuk mangay a diyan. Kiyu daa sa mekeanggan kenak, enù ka netiigan ku dé amuk neanggan a danà sa

egbaelan yu mepion, meanggan ki doo langun. <sup>4</sup>Egoh ku migsulat diyà keniyu egoh anay, tigtu egkebukul a temù owoy egsinegaw a ma. Beken iya sa pesuwan di migsulat a diyà keniyu anì mebukul yu, dodoo ungayà ku polo metiigan yu tigtu eghiduwana ku kiyu.

**Peuloyi Yu Sa Salà Sa Duma Yu**

<sup>5</sup>Na, siedò etaw diyà keniyu nesalà egoh anay, beken aken daa sa nebukul danà di, dodoo kiyu ma sa nebukul. Amuk endà nebukul yu langun, duen doo sa medoo nebukul diyà keniyu. Na, endà meiyap a amuk medaetan sa hagdi pedu danà sa inikagi ku. <sup>6</sup>Enget dé sa kepigtamay yu kenagdi, kiyu i medoo etaw, enù ka inekedan di dé sa salà di. <sup>7</sup>Huenan di, mepion amuk ipeuloy yu dé sa medaet binaelan di. Pebagel yu sa pedu di anì endà sumabuh di migtuu danà di migsubela sa bukul di. <sup>8</sup>Huenan di, egsasà a keniyu, pehauwi yu dema sa kehidu yu kenagdi. <sup>9</sup>Na, iya sa pesuwan di migsulat a diyà keniyu sa denu kenagdi egoh anay anì tepengan ku kiyu anì metiigan ku amuk tigtu yu egpangunut diyà sa langun igsugù ku keniyu. <sup>10</sup>Amuk ipeuloy yu salà sa duma yu, ipeuloy ku ma. Amuk ipeuloy ku sa salà di, netiigan i Kelistu doo sa kepeuloy ku kenagdi anì melanìh sa keugpà yu. <sup>11</sup>Na,

mepion amuk ipeuloy ta salà sa duma ta anì endà meakalan i Satanas kita, enù ka netiigan ta doo duen medoo pandapat di diyà kenita.

**Ini Sa Egoh I Pabelo Egkebukul Dutu Teloas Dò**

<sup>12</sup>Na, egoh ku migtebow Teloas dò anì itulù ku sa Mepion Tegudon denu si Kelistu, hinaa ku tinapay i Nemula dé egbael sa ukit ku tumegudon dahiya. <sup>13</sup>Dodoo tigtu a nebukul, enù ka endà hinaa ku duu dahiya Tito i, sa duma ta epgigtuu. Huenan di, mig-ebal a diyà sa medoo etaw epgigtuu dahiya, agulé miglagbas a dutu uwang Masidoniya dò.

**Ini Sa Kagi I Pabelo Denu Sa Keseluh Sa Mepion Tegudon**

<sup>14</sup>Na, tigtu meolò Nemula i, enù ka danà ké nesesebaen si Hésus Kelistu, igpehaa i Nemula diyà sa langun etaw sa egoh ké nekelaun kedu diyà sa egkegaga i Satanas. Igsalig di diyà kenami sa tegudon denu si Kelistu anì mekeseluh diyà sa langun etaw, lagà sa mepion ngadeg nekeseluh. <sup>15</sup>Netuuwan Nemula i diyà kenami, enù ka danà ké egtulù, nekeseluh sa tegudon denu si Kelistu diyà sa langun etaw, iling ka sa etaw mealukan ataw ka sa etaw mepigtamayan. <sup>16</sup>Na, lagà mahù sa tegudon ké diyà sa etaw endà epgigtuu, enù

ka mepigtamayan da taman melugay. Dodoo lagà mepion ngadeg sa tegudon ké diyà sa etaw egpigtuu, enù ka mebegayan da sa lalù endà meelut di. Huenan di, endà duen etaw mekegaga tumulù siini tegudon amuk endà tabangan i Nemula duu. <sup>17</sup>Endà ma eg-ilingan ké duu sa medoo liyu etaw egtulù sa kagi i Nemula anì kumawasà da daa. Dodoo migsugù i Nemula kenami, owoy netiigan di tigtu metudà sa pedu ké egtegudon danà ké nesesebaen si Kelistu.

**Ini Denu Sa Magtu Ukit I Nemula Umaluk Etaw**

**3** <sup>1</sup>Na, duen etaw guwaen da dò egpeolòlò ké dema anì metuuwan yu diyà kenami. Dodoo endà eg-iling ké sa medoo liyu etaw egtulù, enù ka endà metuuwan yu gaa diyà kenagda amuk endà duen sa sulat ipehaa da denu sa mepion egbaelan da. Hediya ma, endà ma metuuwan sa medoo liyu etaw diyà kenagda amuk endà ma duen sa sulat kedu diyà keniyu. <sup>2</sup>Dodoo kami, endà eg-uwit-uwiten ké duu sa sulat denu kenami, enù ka kiyu polo sa lagà sulat ké neketagù diyà sa pedu ké anì metiigan sa medoo liyu etaw mepion ma sa igtulù ké egpangunutan yu. <sup>3</sup>Lagà kiyu sa sulat kedu si Kelistu, enù ka pineangay di kami diyàn anì mekepigtuu yu.

Uman pa mepion ini i sulat di enù ka beken duu sa melugtem wayeg sa isulat di, dodoo iya polo sa igsulat di sa Metiengaw Suguy i Nemula nehagtay. Beken iya daa sa kenà di migsulat sa batu mepatag lagà sa uledin igsugkow i Mosis egoh anay, dodoo nekesulat polo diyà sa pedu yu.

<sup>4</sup>Egkeikagi ké iya wé, enù ka tigtu egsalig ké diyà si Nemula danà i Kelistu. <sup>5</sup>Netiigan ké beken danà sa nami penemdem ataw ka sa egkegaga ké sa egbaelan ké diyà keniyu. Dodoo, danà i Nemula polo sa egkegaga ké egbael sa langun igsugù di. <sup>6</sup>Enù ka kagdi sa egbegay egkegaga diyà kenami anì meketulù ké denu sa magtu ukit di umaluk etaw. Beken iya sa igsugkow ké sa medoo uledin igsulat, dodoo iya polo sa igsugkow ké sa igtulù sa Suguy i Nemula. Mepigtamayan sa etaw taman melugay danà sa uledin igsulat enù ka endà egkepangunutan da duu, dodoo mebegayan da polo sa lalù endà meelut di danà sa Suguy i Nemula.

<sup>7</sup>Egoh i Mosis migsakem sa uledin nekesulat diyà sa melugpayang batu egoh anay, migsenang sa palas di danà sa dakel senang i Nemula. Apiya di pa eglunuh sa senang di taman sa egoh di mekedan, egkegaipan doo sa medoo tugod i Islaél owoy egkesilang da ma

eg-inengteng kenagdi. Amuk igpehaa i Nemula sa dakel egkegaga di egoh di migbegay iya wé uledin di sa pesuwan etaw mepigtamayan taman melugay, 8uman pa dakel sa egkegaga di egbegay sa Metiengaw Suguy di diyà etaw. 9Amuk igpehaa i Nemula sa dakel egkegaga di danà iya wé uledin igsugkow i Mosis sa pesuwan etaw mepigtamayan, uman pa dakel doo sa egkegaga igpehaa di danà sa magtu ukit di petiengaw kenita diyà sa kehaa di. 10Iya sa inikagi ké, enù ka apiya di pa dakel sa egkegaga iya wé uledin egoh anay, lagà nekedan dé ini egoh di enù ka nekesambì dé sa magtu ukit épê sa uman pa dakel egkegaga. 11Apiya di pa duen egkegaga sa tapay uledin nekedan, uman pa doo dakel sa egkegaga sa magtu ukit di umaluk etaw, enù ka endà mekedan di.

12Danà di meketuu iya wé eg-angat-angatan ta, endà nelimedangan ké egtegudon. 13Endà eg-iling ké si Mosis egoh di miglidung sa palas di anì endà eghauwen sa medoo tugod i Israél sa senang di eglunuh taman egoh di mekedan. 14Egoh iya, endà neketiig da enù ka lagà nedilungan sa penemdem da. Hediya ma taman ini egoh di, enù ka amuk egbasawen da sa libelu denu sa tapay pasad i Nemula, tapay doo nedilungan

sa penemdem da enù ka endà pa egpeketiig da. Endà mekedan sa nekelimun diyà sa penemdem da taman endà migtuu da diyà si Kelistu. 15Taman ini egoh di amuk egbasawen da sa uledin igsugkow i Mosis, tapay doo endà egpeketiig da enù ka lagà nedilungan sa penemdem da. 16Dodoo amuk migtuu sa etaw diyà si Datù, mekedan doo sa nekelimun diyà sa penemdem di anì metiigan di sa kagi i Nemula. 17Na, iya ma sa Datù ta sa Metiengaw Suguy i Nemula. Amuk eg-unut sa etaw diyà sa Suguy i Nemula, nelaun dé diyà sa salà owoy diyà sa uledin igsugkow i Mosis. 18Na, kita i langun etaw epgigtuu, endà dé duen sa nekedilung diyà sa penemdem ta anì metiigan ta sa kedakel sa egkegaga i Datù. Owoy danà sa egkegaga siini Datù ta Suguy i Nemula, takaan di kita eg-upion taman sa egoh di tigtu ki mekeiling kenagdi.

#### Ini Sa Kagi I Pabelo Denu Sa Ketegudon Di

**4** 1Na, danà sa kehidu i Nemula kenami, igbegay di diyà kenami siini galebek anì tumulù ké denu sa magtu ukit di umaluk etaw. Huenan di, endà egkesemek ké egtulù. 2Tigtu eg-ekedan ké sa medaet egbaelan etaw linidung enù ka

mekemala. Endà eg-akalan ké duu sa medoo etaw, owoy endà ma ig-amut ké duu sa butbut diyà sa kagi i Nemula. Dodoo netiigan i Nemula egpetumàmaen ké polo sa tuu tegudon anì metuuwan sa medoo etaw diyà sa egbaelan ké. <sup>3</sup>Dodoo amuk duen etaw endà egpeketiig sa Mepion Tegudon itulù ké, kagda sa mepigtamayan i Nemula. <sup>4</sup>Endà egpigtuu da enù ka metegas sa ulu da danà i Satanas, sa egpenemulawen sa medoo etaw diyà tanà. Pinetegas di sa ulu da anì endà metiigan da duu sa Mepion Tegudon denu sa dakel egkegaga i Kelistu, enù ka metiigan ta doo Nemula i danà i Kelistu enù ka nesetepeng da. <sup>5</sup>Beken kami sa egtatudonen ké, dodoo iya polo sa egtatudonen ké si Hésus Kelistu sa Datù ta. Dodoo, lagà ké polo sa egsugùsuguen yu enù ka egtuluen ké kiyu danà sa kehidu ké si Hésus. <sup>6</sup>Egoh anay egoh i Nemula migpeduen sa tanà, deleman pelawà, agulé pineduen di sa legdaw. Hediya ma sa binaelan di diyà kenami, enù ka egoh anay lagà deleman sa penemdem ké enù ka endà pa netiigan ké duu Kelistu i. Dodoo pinelegdawan di sa penemdem ké anì metiigan ké sa dakel egkegaga i Nemula igpehaa di danà i Kelistu.

<sup>7</sup>Na, lagà ké daa sa kuden tanà dinaleman sa tigtu milagà, enù ka apiya di pa endà duen egkegaga ké, igsalig i Nemula doo diyà kenami sa mapulù tegudon denu si Kelistu, anì metiigan sa langun etaw iya keduwan sa dakel egkegaga si Nemula, beken kami. <sup>8</sup>Huenan di, apiya di pa medoo sa kelikutan ké, endà doo neatuwan ké. Duen ma sa egoh ké endà neketiig sa egbaelan ké, dodoo endà ma nesemek ké. <sup>9</sup>Egkepelihay ké, dodoo endà sinalidan i Nemula duu kami. Takà ké egkesakitan, dodoo endà ma nematay ké. <sup>10</sup>Medoo ké gulê buyu eg-imatayan lagà sa kebael da si Hésus egoh anay. Dodoo danà iya wé, metiigan sa langun etaw nehagtay doo Hésus i enù ka kagdi sa egtabang kenami. <sup>11</sup>Medoo ké gulê buyu eg-imatayan danà ké eg-unut-unut diyà si Hésus. Dodoo iya sa neukitan ké anì metiigan sa medoo etaw nehagtay doo Hésus i, enù ka kagdi sa egtabang kenami anì endà meimatayan ké. <sup>12</sup>Apiya di pa takà ké buyu eg-imatayan danà ké egtatudon, maen dé iya wé, enù ka kumelalù yu polo taman melugay danà sa ketulù ké.

<sup>13</sup>Na, duen sa kagi etaw diyà sa kagi i Nemula igpesulat, guwaen di,

“Migpigttuu a diyà si Nemula,  
huenan di tumulon a diyà  
etaw.”<sup>a</sup>

Hediya ma kami i, egpigttuu ké  
ma dé, huenan di egtulonen ké  
ma sa pesuwan ké egpigttuu.  
14Netiigan ké si Nemula sa  
mig-enaw si Datù Hésus egoh di  
nematay, huenan di enawen di  
ma kita kani danà ta nesesebaen  
si Hésus, owoy uwiten di ma  
kita, lapeg kiyu, dutu kenà di  
dò. 15Apiya di pa egkepelihay  
ké, kumepion yu polo, owoy  
kumedoo ma sa etaw migttuu  
danà sa mepion ketabang  
ipeuloy i Nemula diyà kenagda,  
huenan di tigtu da ma umolò si  
Nemula anì lumalag temù.

**Ini Denu Sa Ibegay I Nemula  
Diyà Sa Etaw Egpigttuu**

16Huenan di, endà  
egkesemek ké egtegudon. Apiya  
di pa egkelenek sa lawa ké,  
uman agdaw pebagelen i  
Nemula doo sa pedu ké.  
17Medelamet daa meelut siini  
medoo kelikutan egkeukitan ké  
ini egoh di. Amuk egtigkelan ké  
iya wé, duen doo sa tigtu  
mepion untung sakemen ké kani  
diyà si Nemula. Lagà tigtu  
diisek daa siini lihay ké ini egoh  
di amuk egpenemdemen ké sa  
tigtu dakel mepion untung endà  
meelut di. 18Beken sa medoo  
eghauwen ta diyà tanà sa

egpedakelen ké diyà sa pedu ké,  
enù ka buyu dé mekedan iya  
wé. Dodoo iya polo sa  
egpedakelen ké sa medoo endà  
pa hinaa ta duu dutu langit dò,  
enù ka endà mekedan di taman  
melugay.

**5** 1Na, endà ma egkesemek  
ki eg-unut diyà si Nemula,  
enù ka netiigan ta amuk  
melukat siini lawi éhê sa lawa  
ta amuk mematay, duen doo sa  
kenà ta mugpà dutu langit dò sa  
magtu lawa ta egbaelan i  
Nemula, owoy mebaluy taman  
melugay enù ka endà dé  
mematay di. 2Dodoo egoh ta  
pelawà diyà tanà, egkelikutan  
ki temù, huenan di dakel sa  
ungayà ta mebegayan ki sa  
magtu lawa ta dutu langit dò.  
3Ungayà ta mebegayan ki dé iya  
wé anì dumuen sa lawa ta kenà  
sa suguy ta mugpà kani amuk  
meenaw ki. 4Dodoo egoh ta  
eg-ugpà pelà diyà siini lawi diyà  
tanà, egkepasangan ki pelà enù  
ka lagà ki egkebegatan danà sa  
kelikutan ta diyà tanà. Dodoo  
endà meiyap ki sumalid siini  
lawa ta, dodoo iya polo sa  
ungayà ta mebegayan ki dé ini  
egoh di sa magtu lawa ta  
melalù taman melugay kedu  
diyà langit anì mesambian sa  
lawa ta egkematay. 5Si Nemula  
sa mighemilì kenita anì  
mesakem ta sa magtu lawa ta.

<sup>a</sup> 4:13 Basa ko Isalem 116:10.



Owoy pineugpà di ma sa Metiengaw Suguy di diyà kenita enù ka iya sa tandà di meketuu sa langun igpasad di diyà kenita.

6Huenan di, sumalà dé sa egkeukitan ta, pebagelen ta doo sa pedu ta, enù ka netiigan ta egoh ta pelà diyà tanà, endà pa diyà ki sa kenà i Datù. 7Dodoo egoh ta nehagtay pelà, egسالigan ta doo kagdi i apiya di pa endà pa hinaa ta duu. 8Tigtu mebagel doo sa pedu ké, owoy ungayà ké salidan ké hedem sa lawa ké diyà tanà anì mangay ké mugpà diyà si Datù dutu langit dò. 9Dodoo, amuk dahini ké pelà diyà tanà ataw ka dutu ké langit dò, iya daa sa tigtu ungayà ké metuuwan Nemula i diyà kenami. 10Enù ka mekeangay ki langun kani diyà sa taengan i Kelistu anì tepengan di kita anì sakemen sa uman sebaen etaw sa hagdi untung nesugat denu sa binaelan di diyà tanà. Mepion sa mekebegay diyà sa etaw migbael mepion, dodoo medaet sa mekebegay diyà sa etaw migbael medaet.

**Mebaluy Loyuken I Nemula Kita  
Danà I Kelistu**

11Na, netiigan ké tigtu egkelimedangan sa medoo etaw sa agdaw egoh i Datù tumepeng sa binaelan ta langun, huenan di takà ké egtulù anì migtuu sa medoo

etaw. Netiigan i Nemula metiengaw sa pedu ké, owoy ungayà ku metiigan yu ma iya wé. 12Yoko egpenemdem duu egpeoldòlò ké diyà keniyu. Dodoo ini daa sa ungayà ké endà memalaan yu diyà kenami anì mekesagbì yu polo diyà sa medoo liyu etaw egpeoldòlò denu sa hagda adat eghauwen etaw, beken denu sa metiengaw pedu da. 13Amuk guwaen sa etaw egkelengleng ké danà ké megelol egtegudon, maen dé iya wé enù ka iya daa sa ungayà ké meoldò Nemula i. Endà egkelengleng ké, dodoo ungayà ké polo tabangan ké kiyu. 14Megelol ké egtegudon enù ka tigtu eghiduwan i Kelistu kami, enù ka netiigan ké nematay Kelistu i anì tigtuwan di sa salà sa langun etaw. Apiya sebaen di daa sa nematay, lagà ki nematay langun. 15Nematay Kelistu i anì tigtuwan di sa salà sa langun etaw anì endà dé eg-unutan ta duu sa nita daa ungayà, kita i nehagtay pelà. Dodoo iya polo sa unutan ta sa hagdi ungayà, enù ka kagdi sa nematay owoy neenaw dema anì mealukan ki.

16Egoh anay sa penemdem ké lagà sa penemdem sa medoo liyu etaw endà egpigtuu, enù ka egluwoh ké ma sa medoo etaw, huenan di egluwohen ké ma Kelistu i. Dodoo ini egoh di nesambian

dé sa penemdem ké denu kenagdi. <sup>17</sup>Huenan di, amuk duen etaw nesesebaen da dé si Kelistu, kagdi sa lagà magtu etaw. Minekedan dé sa tapay adat di tegebael medaet owoy duen dé sa magtu pedu di. <sup>18</sup>Binaelan i Nemula langun iya wé, enù ka apiya di pa egkesekuntelà ki si Nemula egoh anay, eg-upionen di doo kita danà i Kelistu anì meseloyuk ki dé. Igsalig di ma diyà kenami siini galebek anì tumegudon ké diyà sa medoo etaw anì upionen di ma kagda. <sup>19</sup>Ini sa tegudon ké, mebaluy doo upionen i Nemula sa langun etaw anì meloyuk da kagdi i danà sa binaelan i Kelistu. Endà egsagipaen di duu sa medoo salà da enù ka igpeuloy di dé. Iya sa Mepion Tegudon igsalig di diyà kenami sa itulù ké diyà sa medoo etaw. <sup>20</sup>Huenan di, kami sa salu i Kelistu pineangay di anì tumulù ké sa kagi di, enù ka danà ké eg-ikagi, lagà si Nemula dé sa egsasà keniyu. Danà i Kelistu migsugù kenami, egsasaen ké kiyu anì meseloyuk yu si Nemula. <sup>21</sup>Apiya di pa endà duen salà binaelan i Kelistu, pinigtamayan i Nemula doo kagdi danà sa medoo salà ta, anì petiengawen di kita diyà sa

kehaa di danà ta nesesebaen si Kelistu.

**6** <sup>1</sup>Na, nesesebaen ké si Nemula diyà sa galebek di, huenan di ini sa isasà ké diyà keniyu. Amuk sinakem yu dé sa mepion ketabang ipeuloy i Nemula, yoko egpeuhang duu. <sup>2</sup>Enù ka ini sa kagi i Nemula igpesulat, guwaen di, “Egoh di neuma sa agdaw hinemilì ku, dinineg ku sa kesimbà yu, owoy egoh di neuma sa agdaw ku umaluk keniyu, tinabangan ku kiyu.”<sup>b</sup>

Na, taa yu, hih. Neuma dé ini egoh di sa agdaw hinemilì i Nemula egoh di egpehaa sa kehidu di keniyu, owoy ini ma dé sa agdaw di eg-aluk keniyu.

<sup>3</sup>Na, ungayà ké endà duen sa kenà etaw sumigbolow sa ketulù ké. Huenan di, tigtu egtulikan ké sa egbaelan ké anì endà mealang sa kepigtuu da. <sup>4</sup>Sumalà dé sa egbaelan ké, ipehaa ké polo sa metiengaw adat ké anì metiigan sa etaw kami sa sinugù i Nemula danà ké egtigkel sa lihay ké owoy sa medoo kelikutan ké ma. <sup>5</sup>Tinigkelan ké apiya di pa binalbal ké, owoy nebilanggu ké, owoy hinemagawan ké danà sa medoo etaw tegebogo. Tinigkelan ké apiya di pa tigtu melikut sa galebek ké, owoy

<sup>b</sup> 6:2 Basa ko Isayas 49:8.

duen ma sa egoh ké endà egpeketudug owoy endà ma egpekekaen ké. <sup>6</sup>Dodoo danà ké sinugù i Nemula, metiengaw doo sa adat ké, owoy egketiigan ké ma sa tuu tegudon. Metaes sa tali ké, owoy mipedu ké ma, owoy eg-ugpà sa Metiengaw Suguy i Nemula diyà kenami, owoy tigtu eghiduwan ké sa medoo etaw. <sup>7</sup>Iya sa itulù ké sa tuu tegudon, owoy tinunungan i Nemula ma kami. Lagà ké sa sundalu épè kinemkem anì atuwan di sa kuntelà di, enù ka iya sa lagà sundang owoy kelasag sa metiengaw adat ké. <sup>8</sup>Duen etaw eg-adat kenami, owoy duen ma egluwoh. Duen etaw eg-olò kenami, owoy duen ma egsumbung. Apiya di pa guwaen da dò tegebutbut ké, anan tuu doo sa eg-ikagiyen ké. <sup>9</sup>Apiya di pa guwaen da tigtu mepokò ké etaw, lumalag ké ma doo. Takà ké buyu egkematay, dodoo nehagtay ké doo. Pineukit i Nemula kami diyà sa dakel kelikutan, dodoo endà neimatayan ké. <sup>10</sup>Apiya di pa duen sa egkebukulan ké diyà tanà, takà ké doo egkeanggan. Tigtu pubeli ké etaw, dodoo dakel doo sa isugkow ké diyà sa medoo etaw egtuluen ké. Endà duen sa medoo langun taman ké diyà tanà, dodoo kami polo épè sa langun taman ibegay i Nemula.

<sup>11</sup>Na, o medoo duma ké dutu Kolintu dò, tinulon ké dé diyà

keniyu sa langun penemdem ké, owoy netiigan yu tigtu eghiduwan ké kiyu. <sup>12</sup>Endà kulang sa kehidu ké keniyu, dodoo kiyu polo sa kulang mehidu kenami. <sup>13</sup>Egsasaen ku kiyu i lagà anak ku anì pedakel yu sa pedu yu diyà kenami, iling mendaa sa dakel kehidu ké keniyu.

**Ini Sa Isasà I Pabelo  
Anì Endà Eg-unut Da Sa Etaw  
Endà Egpigtuu**

<sup>14</sup>Na, yoko eg-amut ta diyà sa medoo etaw endà egpigtuu, enù ka endà mebaluy di meseamut sa mepion owoy sa medaet. Hediya ma, endà ma neseamut sa legdaw owoy sa delem. <sup>15</sup>Endà mebaluy di mesesebaen sa pedu i Kelistu owoy sa pedu i Satanas. Hediya ma, endà ma mebaluy di amuk mesesebaen sa pedu sa etaw egpigtuu owoy sa etaw endà egpigtuu. <sup>16</sup>Endà ma mebaluy di meseamut sa inetaw owoy sa Dalesan i Nemula. Hediya ma kita i etaw egpigtuu, lagà ki sa dalesan eg-ugpaan sa Nemula melalù, enù ka duen sa kagi i Nemula igpesulat, guwaen di,  
“Mugpà a diyà kenagda,  
owoy munut a ma diyà kenagda.  
Aken sa Nemula simbaan da,

owoy kagda sa meetaw ku.”<sup>c</sup>  
 17Huenan di, guwaen i Datù  
 Nemula,

“Pedyù yu dé diyà sa medoo  
 etaw endà eg-unut da diyà  
 kenak  
 owoy yoko eg-amut ta diyà  
 kenagda,  
 owoy yoko ma eg-iling duu  
 sa medaet egbaelan da.

Amuk hediya sa egbaelan yu,  
 metuuwan a diyà keniyu.”<sup>d</sup>

18 “Owoy aken sa meemà yu,  
 owoy kiyu sa meanak ku.  
 Iya sa inikagi i Datù Nemula  
 épè dakel egkegaga.”<sup>e</sup>

**7** 1Na, o medoo duma ku  
 eghiduwan ku, danà iya  
 wé igpasad i Nemula diyà  
 kenita, mepion amuk tigtu  
 ekedan ta sa langun balangan  
 medaet, iling ka sa egbaelan ta  
 ataw ka sa penemdem ta, owoy  
 petiengawen ta ma kita diyà sa  
 kehaa i Nemula danà sa keadat  
 ta kenagdi.

#### **Ini Sa Kekeanggan I Pabelo**

2Na, tigtu yu pedakel sa pedu  
 yu diyà kenami. Netiigan yu ma  
 doo endà nesalà ké diyà keniyu,  
 owoy endà ma pinedaetan ké  
 duu sa kepigtuu sa etaw diyan,  
 owoy endà ma duen etaw  
 inakalan ké. 3Beken iya sa  
 pesuwan ku mig-ikagi a iya wé

anì sigbolowen ku kiyu. Dodoo  
 eg-ikagiyan ku dema sa tapay  
 inikagi ku, tigtu eghiduwan ku  
 kiyu. Apiya di pa mematay ké  
 ataw ka nehagtay ké pelà, tapay  
 doo endà mekedan sa kehidu ku  
 keniyu. 4Tigtu egsaligan ku  
 kiyu, owoy ipeoldòlò ku ma  
 kiyu diyà sa medoo liyu etaw.  
 Apiya di pa medoo sa kelikutan  
 ké, mebagel doo sa pedu ké  
 owoy tigtu neanggan ké ma  
 danà yu.

5Egoh anay egoh ké  
 migtebow diyà uwang  
 Masidoniya, endà egpekeetud  
 ké enù ka takà ké  
 egkepasangan. Sumalà dé sa  
 inangayan ké, nepelihat ké doo  
 owoy sinigbolow ké etaw owoy  
 nebukul ké ma denu keniyu i  
 etaw egpigtuu. 6Dodoo si  
 Nemula sa pebagel sa pedu sa  
 etaw egkebukul, owoy  
 pinebagel di ma kami danà i  
 Tito migtebow kedu diyan.

7Neanggan ké egoh di  
 migtebow dahini, dodoo uman  
 pa neanggan ké egoh di  
 migtulon kenami sa kekeanggan  
 di denu keniyu. Tinulon di ma  
 kenami sa ungayà yu humaa  
 kenak, owoy tinulon di ma sa  
 kekebukul yu danà sa medaet  
 binaelan yu owoy sa ungayà yu  
 ma mangunut diyà sa igsasà ku  
 keniyu. Huenan di, egoh ku

<sup>c</sup> 6:16 Basa ko Isikiyél 37:27. <sup>d</sup> 6:17 Basa ko Isayas 52:11; Isikiyél 20:34.

<sup>e</sup> 6:18 Basa ko 2 Samuwél 7:14.

neketiig iya wé, neanggan a temù.

8Apiya di pa nebukul yu danà sa tapay igsulat ku diyà keniyu, endà doo mebegat sa pedu ku danà ku migsulat iya wé. Tuu mebegat sa pedu ku egoh anay enù ka netiigan ku melugaylugay yu mebukul danà iya wé surat ku. 9Dodoo neanggan a dé ini egoh di. Beken iya sa pesuwan ku neanggan danà yu nebukul, dodoo neanggan a polo enù ka pinelumanan yu dé sa egbaelan yu danà yu nebukul. Na, danà sa uyot i Nemula iya wé, huenan di mepion doo sa ketamanan sa surat ké diyà keniyu. 10Amuk danà i Nemula sa kekebukul etaw, mebaluy doo iya sa pesuwan di metuing sa pedu di diyà si Nemula anì mealukan. Huenan di, endà mepion di amuk mebegat sa pedu ta danà sa kekebukul kedu si Nemula. Dodoo amuk mebukul sa etaw endà egpigtuu owoy amuk endà ma metuing sa pedu di diyà si Nemula, endà doo mebegayan di sa lalù endà meelut di. 11Dodoo taa yu, hih, sa binaelan i Nemula diyà keniyu danà iya wé kekebukul yu. Meudes yu dé egpepion sa egbaelan yu, owoy dakel ma sa ungayà yu egpetiig diyà etaw endà eg-ilingan yu duu sa binaelan iya wé etaw nesalà. Tigtu egkelepuhan yu ma sa medaet binaelan di, owoy

nelimedangan yu ma amuk mekelapeg yu diyà sa kepigtamay i Nemula kenagdi. Mebugaan yu aken, owoy ungayà yu tigtu yu mangunut diyà sa igsugù i Nemula keniyu anì metuuwan a diyà keniyu. Pinigtamayan yu ma dé iya wé etaw nesalà. Na, danà iya wé binaelan yu, tinandaan yu dé endà duen sa niyu diyà sa hagdi salà.

12Egoh ku migsulat diyà keniyu egoh anay, beken iya daa sa ungayà ku mepigtamayan sa etaw nesalà diyan, ataw ka pepionen ku daa sa etaw kenà di nesalà. Dodoo netiigan i Nemula doo migsulat a iya wé anì ipetiig ku diyà keniyu tigtu dakel sa kehidu yu kenami. 13Huenan di, neanggan ké temù, enù ka neketuu dé iya wé ungayà ku.

Apiya di pa neanggan ké denu iya wé, uman ké polo neanggan egoh ké mighaa sa kekeanggan i Tito danà sa mepion binaelan yu diyà kenagdi. 14Egoh anay inolò ku kiyu diyà kenagdi egoh di endà pa mig-angay diyan. Na, endà dé memala a enù ka egoh di migtebow dé diyà keniyu, hinaa di doo tigtu tuu sa kagi ku denu keniyu. Anan tuu sa inikagi ku diyà keniyu egoh anay, owoy tuu ma doo sa inikagi ku diyà si Tito denu keniyu. 15Netulengan i Tito sa kepangunut yu diyà sa igsugù ku inuwit di diyan owoy

sa kesalù yu kenagdi, apiya di pa nebukul yu owoy nelimedangan yu ma. Huenan di, migkedakel sa kehidu di keniyu. <sup>16</sup>Na aken, tigtu a dé neanggan temù, enù ka netiigan ku mesaligan ku doo kiyu.

**Ini Denu Sa Kebegay  
Etaw Egpigtuu**

**8** <sup>1</sup>Na, o medoo дума ké egpigtuu, ungayà ké metiigan yu sa binaelan sa medoo umpungan i Hésus diyà uwang Masidoniya, enù ka mepion sa binaelan da danà sa dakel ketabang i Nemula kenagda. <sup>2</sup>Apiya di pa tigtu melikut sa nehaa da, tigtu da polo neanggan owoy metawag da ma doo egbegay tabang, apiya di pa pubeli da etaw. <sup>3</sup>Egtulonen ku diyà keniyu igbegay da daa uloy taman sa egkegaga da egbegay, owoy pinesubela da ma sa kebegay da. Danà sa hagda daa uyot egbegay, <sup>4</sup>tigtu da migpegeni diyà kenami anì umiling da ma megay tabang diyà sa medoo etaw i Nemula dutu uwang Hudiya dò. <sup>5</sup>Guwaen ké dò endà iseg di medoo sa ibegay da, dodoo dakel polo sa igbegay da, enù ka muna da dé egbegay sa pedu da diyà si Datù, agulé egسالig da ma diyà kenami enù ka iya sa uyot i Nemula diyà kenagda.

<sup>6</sup>Na, tigtu mepion sa binaelan iya wé medoo etaw

tegeMasidoniya. Huenan di, sinasà ké Tito i anì pelikù dema diyan anì buligan di kiyu anì meubus yu tumipoh sa tabang ibegay yu, enù ka kagdi sa mig-edung migbulig keniyu egtipoh egoh anay. <sup>7</sup>Tigtu yu dé miglalag denu sa langun egbaelan yu, enù ka meeles sa kepigttuu yu, owoy megelol yu ma egtulù, owoy netiigan yu ma sa tuu tegudon, owoy megelol yu ma egpangunut diyà si Nemula, owoy dakel ma sa kehidu yu kenami. Huenan di, ungayà ké lumalag yu ma danà sa ketawag yu egbegay tabang diyà sa medoo etaw egkepasangan.

<sup>8</sup>Endà egtegelen ku duu kiyu egpebegay. Dodoo ungayà ku polo ipetiig ku diyà keniyu denu sa medoo liyu etaw metawag egbegay tabang, anì metiigan ku ma amuk tigtu tuu sa niyu kehidu. <sup>9</sup>Netiigan yu doo tigtu dakel sa kehidu i Hésus Kelistu, sa Datù ta, diyà kenita. Apiya di pa tigtu kawasà dutu langit dò, migkepubeli polo temù danà di neetaw diyà tanà anì alukan di kiyu. Huenan di, danà iya wé binaelan di, tigtu kumawasà yu polo dutu langit dò.

<sup>10</sup>Na, apiya di pa endà egtegelen ku duu kiyu, ini sa penemdem ku. Mepion amuk meubus yu dé tumipoh sa pilak, sa inedungan yu egoh siini palay netebas, enù ka kiyu sa

anay etaw egtipoh pilak danà sa ungayà yu daa egtabang sa etaw egkepasangan. **11**Uman yu pa anì meubus dé sa ketipoh yu pilak. Egoh anay egoh yu mig-edung egtipoh pilak, dakel sa ungayà yu egbegay tabang, huenan di mepion amuk endà mesemek yu anì meubus dé siini galebek yu, taman sa egkegaga sa uman sebaen etaw egbegay. **12**Enù ka amuk dakel sa ungayà yu egbegay tabang owoy amuk ibegay yu ma sa mekebegay yu, metuuwan doo Nemula i diyà sa egbaelan yu, enù ka endà itegel di duu ipebael kenita sa endà megaga ta.

**13**Beken iya sa ungayà ku amuk mepubeli yu danà sa kebegay yu tabang diyà sa medoo liyu etaw anì kumelanih sa hagda keugpà. **14**Dodoo ungayà ku polo setabangay yu langun. Amuk subela sa niyu ini egoh di, mepion amuk tabangan yu sa medoo дума yu egkepasangan. Agulé amuk meuma ma kani sa egoh yu mepasangan owoy kagda ma sa duen, metabangan da ma kiyu. Amuk hediya sa egbaelan yu, mesetabang yu langun. **15**Duen sa kagi i Nemula igpesulat denu sa egoh etaw Hudiyu migtipoh sa kaenen igbegay i Nemula egoh anay, guwaen di,

“Amuk medoo sa netipoh sa etaw,  
endà ma subela sa nekuwa di.

Hediya ma sa liyu etaw migtipoh tukéy,  
endà ma duen sa kulang di.”<sup>f</sup>

**Ini Denu Si Tito Owoy Sa Duma Di Mangay Kolintu Dò**

**16**Na, tigtu ké egpesalamat diyà si Nemula, enù ka igbegay di diyà si Tito sa dakel pedu di tumabang keniyu, lagà mendaa sa nami pedu. **17**Egoh ké migsasà diyà si Tito anì mangay dema diyà keniyu, tigtu egkeiyap dema pelikù diyan, enù ka iya sa tapay ungayà di tumabang keniyu. **18**Na, egpeunuten ké diyà si Tito sa sebaen дума ta egpigtuu. Tigtu eg-adatan ma sa langun umpungan i Hésus kagdi i, enù ka megelol egtulù sa Mepion Tegudon denu si Kelistu.

**19**Owoy beken iya daa, enù ka kagdi ma sa hinemilì sa medoo umpungan i Hésus anì munut diyà kenami amuk uwiten ké sa itabang yu diyà sa medoo дума ta egkepasangan. Uwiten ké diyà kenagda anì meolò Datù i anì mehaa ma sa pedu ta tumabang kenagda.

**20**Na, egpeunuten ké siini дума ta anì endà duen etaw sumigbolow kenami danà sa

<sup>f</sup> 8:15 Basa ko Éksodo 16:18.

keuwit ké siini dakel tabang dutu. <sup>21</sup>Ungayà ké mepion sa egbaelan ké diyà sa kehaa i Nemula owoy diyà sa kehaa sa langun etaw ma.

<sup>22</sup>Na, duen ma sa sebaen ma duma ta egpigtuu peunuten ké diyà si Tito mangay diyan. Medoo gulê egtukawan ké kagdi i, owoy netiigan ké megelol ma diyà sa langun egbaelan di. Dakel sa pedu di mangay tumabang keniyu enù ka tigtu egسالigan di kiyu. <sup>23</sup>Na, si Tito sa duma ku egtulù keniyu. Siini duwa etaw umunut diyà kenagdi, kagda ma sa pineangay sa medoo umpungan i Hésus anì meolò Kelistu i danà sa egbaelan da. <sup>24</sup>Huenan di, amuk tumbow da diyan, pehauwi yu sa kehidu yu kenagda anì metiigan sa langun umpungan i Hésus tuu sa kehidu yu diyà sa duma yu owoy tuu ma sa inikagi ké denu sa mepion egbaelan yu.

#### **Ini Denu Sa Kitabang Da Duma Da**

**9** <sup>1</sup>Na, endà dé duen pesuwan ku sumulat a uman diyà keniyu denu sa kepeuwit yu tabang diyà sa medoo etaw i Nemula dutu Hudiya dò, <sup>2</sup>enù ka netiigan ku tigtu egkeiyap yu tumabang kenagda. Huenan di, inolò ku kiyu diyà sa medoo etaw tegeMasidoniya egpigtuu, guwaen ku, “Egoh siini palay

netebas, iya sa ungayà sa medoo duma ta egpigtuu diyà uwang Akaya megay da tabang.” Na, egoh da neketiig denu sa kebegay yu tabang, egkedoo da ma egkeiyap megay sa tabang. <sup>3</sup>Huenan di, egpeangayen ku dé diyà keniyu siini duma ta lapeg si Tito, anì metiigan etaw endà uloy di kagi ku daa sa keolò ku keniyu, dodoo ubusen yu polo tumipoh sa itabang yu iling sa inikagi ku denu keniyu. <sup>4</sup>Enù ka amuk mangay a diyan owoy duen ma etaw munut kenak tegeMasidoniya, memalaan a amuk hauwen da endà netapay sa igtabang yu. Owoy kiyu ma, uman pa dakel sa niyu mala, enù ka inolò ku dé kiyu diyà kenagda denu sa ketipoh yu tabang. <sup>5</sup>Huenan di, iya sa penemdem ku mepion amuk pehunawen ku siini telu duma ta mangay diyan anì buligan da kiyu egtipoh sa tabang igpasad yu egbegay. Agulé amuk tumbow a diyan, tapay dé duen sa itabang yu, owoy metiigan da ma beken iya sa pesuwan yu egbegay amuk danà yu netegel, dodoo danà sa niyu uyot polo egbegay.

<sup>6</sup>Netiigan yu doo ini i. Amuk tukéey daa sa ig-ohok sa etaw, tukéey ma daa sa meketu di. Dodoo amuk medoo sa ig-ohok di, medoo ma sa mekuwa di. <sup>7</sup>Hediya ma sa etaw egbegay. Mepion amuk egpenemdem sa



uman sebaen etaw sa kedoo mekebegay di, owoy iya daa sa ibegay di. Endà mepion di amuk mebegat sa pedu di egbegay, owoy endà ma mepion di amuk tinegel di egpebegay, enù ka iya sa kenà i Nemula netuuwan sa etaw egbegay danà sa pedu di megaen. <sup>8</sup>Tigtu megaga i Nemula ibegay diyà kenita sa uman pa dakel diyà sa kulang ta, anì dumuen takà sa langun taman ta anì dumuen ma sa subela di itabang ta diyà sa medoo duma ta. <sup>9</sup>Duen sa kagi i Nemula igpesulat denu sa etaw metiengaw, guwaen di,

“Kagdi sa metawag egbegay diyà sa pubeli,  
owoy endà duen taman sa kebael di mepion.”<sup>g</sup>

<sup>10</sup>Na, si Nemula sa egbegay benì diyà sa tegehemula anì duen sa mekaen da. Hediya ma, ibegay di diyà kenita sa lagà benì owoy pedoowen di ma sa bunga di anì meumanan sa itabang ta diyà sa medoo etaw. <sup>11</sup>Takà egtabangan i Nemula kiyu anì metawag yu ma egbegay diyà sa etaw egkepasangan. Huenan di, tigtu kumedoo sa etaw umolò si Nemula danà sa ketabang yu kenagda ipeuwit yu diyà kenami. <sup>12</sup>Enù ka amuk duen sa tabang ibegay yu, tigtu metabangan sa medoo etaw i

Nemula egkepasangan, owoy beken iya daa dodoo medoo ma sa etaw umolò si Nemula danà sa ketabang yu. <sup>13</sup>Amuk metiigan da metawag yu, tigtu oloen da Nemula i enù ka egpangunut yu diyà sa Mepion Tegudon denu si Kelistu egsaligan yu, owoy oloen da ma kagdi i danà yu metawag egbegay tabang diyà kenagda lapeg sa langun etaw. <sup>14</sup>Amuk iya sa egbaelan yu, tigtu hiduwan da kiyu owoy isimbà da ma kiyu danà sa dakel ketabang ipeuloy i Nemula diyà keniyu. <sup>15</sup>Huenan di, tigtu meolò ta Nemula i danà di migbegay sa Anak di diyà kenita. Endà meikagi ta duu sa lagà di enù ka tigtu milagà temù.

#### Ini Denu Sa Galebek I Pabelo

**10** <sup>1</sup>Na, si Pabelo a eg-ikagi ini i diyà keniyu. Duen etaw guwaen da dò melenek a gaa amuk diyà a keniyu, dodoo mebalaw a gaa amuk egsulat a diyà keniyu kedu mediyù dò. Dodoo danà ku eg-iling sa adat i Kelistu egoh di migpetukééy owoy mipedu ma, <sup>2</sup>huenan di egsasà a diyà keniyu anì pepionen yu sa adat yu anì endà mebulitan ku kiyu amuk tumbow a diyan, enù ka tigtu doo bulitan ku sa

<sup>g</sup> 9:9 Basa ko Isalem 112:9.

medoo etaw egsumbung kenami guwaen da dò eg-unut ké gaa sa nami daa uyot lagà sa medoo liyu etaw endà epgigtuu. <sup>3</sup>Tuu ma doo, kami sa etaw lagà keniyu mendaa eg-ugpà diyà tanà, dodoo endà lagà di sa gila diyà tanà daa sa ukit ké eg-atu sa medaet, enù ka endà egsalig ké diyà sa egkegaga etaw. <sup>4</sup>Beken sa kinemkem etaw eggila diyà tanà sa kinemkem ké anì umatu ké diyà sa medaet, dodoo tigtu mekegaga sa kinemkem ké igbegay i Nemula diyà kenami. Huenan di, mekegaga ké umatu diyà sa langun egkuntelà sa tuu tegudon, apiya di pa mebagel da. <sup>5</sup>Eg-atuwan ké sa endà tuu kesigbolow etaw owoy sa kepeoldòlò sa etaw eg-alang sa tuu tegudon denu si Nemula, owoy meatuwan ké ma sa medaet penemdem da anì mangunut da polo diyà si Kelistu. <sup>6</sup>Na, tigtu yu dé pangunut diyà si Nemula, enù ka amuk mangay ké diyan, pigtamayan ké doo sa medoo etaw endà egpangunut.

<sup>7</sup>Taa yu, hih. Duen etaw diyà keniyu guwaen da dò kagda daa sa tigtu etaw i Kelistu. Dodoo mepion amuk metiigan da kami enù ka kami ma doo sa etaw i Kelistu. <sup>8</sup>Apiya di pa egpeoldòlò a dema denu sa egkegaga igbegay i Nemula diyà kenami, endà ma igkemala ku duu iya wé, enù ka binegayan di kami

egkegaga anì pebagelen ké sa kepigttuu yu; endà pedaet ké sa kepigttuu yu. <sup>9</sup>Apiya di pa hediya sa inikagi ku diyà keniyu, endà doo meiyap a amuk melimedangan yu danà sa surat ku diyà keniyu. <sup>10</sup>Dodoo, duen etaw diyan guwaen da dò mebalaw a gaa owoy egbulit a ma amuk egsulat a diyà keniyu, dodoo amuk diyà a keniyu melenek a gaa owoy endà ma mekegaga a tumulù keniyu. <sup>11</sup>Amuk hediya sa penemdem da, mepion amuk metiigan da iya polo sa unutan ké amuk tumbow ké diyan sa surat ké egoh ké endà pa diyan.

<sup>12</sup>Na, meked ké umiling sa adat sa medoo liyu etaw egpedakelen da kagda. Tigtu endà milantek sa penemdem da, enù ka guwaen da dò kagda daa sa egpeketiig gaa sa mepion egbaelan etaw. Ipeiling da daa sa hagda adat, huenan di sumalà dé sa egbaelan da, guwaen da dò anan mepion.

<sup>13</sup>Dodoo kami i, endà subela sa kepeoldòlò ké, enù ka iya daa sa ipeoldòlò ké sa galebek ipebael i Nemula diyà kenami, lapeg sa egbaelan ké egoh ké diyà keniyu. <sup>14</sup>Na, danà yu nekelapeg diyà sa galebek ipebael i Nemula diyà kenami, huenan di endà egtipay ké sa igsugù di egoh ké egtulù diyà keniyu, enù ka kami sa anay mig-angay diyà keniyu anì egtulù ké sa Mepion Tegudon

denu si Kelistu. <sup>15</sup>Dodoo endà egpeolòlò ké denu sa binaelan sa medoo liyu etaw diyà sa kenà i Nemula endà migpeangay kenami. Dodoo ungayà ké polo kumebagel sa kepigtuu yu owoy meumanan ma sa galebek ké diyà keniyu taman endà meubus sa langun ipebael i Nemula diyà kenami. <sup>16</sup>Amuk kumebagel dé sa kepigtuu yu, mekeangay ké ma tumulù sa Mepion Tegudon diyà sa medoo mediyù menuwa lekedutu yu. Enù ka meked ké egpeolòlò denu sa binaelan sa liyu etaw diyà sa menuwa kenà i Nemula endà migpeangay kenami. <sup>17</sup>Duen sa kagi i Nemula igpesulat, guwaen di,  
 “Amuk ungayà sa etaw egpeolòlò,  
 iya daa sa meolò di sa binaelan i Datù Nemula.”<sup>h</sup>  
<sup>18</sup>Na, endà metuuwan Nemula i diyà sa etaw egpeolòlò danà sa hagda daa binaelan. Dodoo amuk si Nemula sa umolò sa etaw, netiigan ta tigtu tuu iya wé.

**Ini Denu Sa Medoo Etaw Guwaen  
 Da Dò Kagda Sa Salu I Hésus**

**11** <sup>1</sup>Na, ungayà ku endà mesemek yu dumineg sa ikagiyen ku diyà keniyu, apiya di pa lagà a sa etaw endà

duen penemdem. Tigkel yu, hih. <sup>2</sup>Tigtu egkebukulan ku kiyu lagà sa kebukul i Nemula keniyu. Ungayà ku endà tumangkà yu diyà si Kelistu, enù ka kiyu sa lagà melanilh kenogon igpasad ku ipesawa diyà sa sebaen daa maama. <sup>3</sup>Egkelenawan a amuk mehalì sa penemdem yu denu si Kelistu owoy mekedan ma sa dakel kehidu yu kenagdi danà yu meakalan. Mekeiling yu kéen si Iba egoh anay enù ka neakalan danà sa metolol kagi sa uled egbutbut, si Satanas. <sup>4</sup>Egkebukul a keniyu enù ka egkeanggan yu amuk duen etaw mangay tumegudon diyà keniyu, owoy migtuu yu ma sa ketulù da denu si Hésus apiya di pa tigesà diyà sa nami ketegudon. Hediya ma, tigesà ma sa itulù da keniyu denu sa Suguy i Nemula, owoy metuuwan yu ma doo diyà sa tegudon da, apiya di pa beken sa tuu tegudon igtulù ké keniyu. Egkegaip a keniyu enù ka egkeiyap yu egdinegdineg sa ketulù da.

<sup>5</sup>Na, siedò medoo etaw diyà keniyu guwaen da dò kagda gaa sa mapulù salu i Hésus, netiigan ku doo endà lumowon da diyà kenak. <sup>6</sup>Apiya di pa endà tigtu a egpekegaga egtulù, netiigan ku doo sa tuu

<sup>h</sup> 10:17 Basa ko Hilimiyas 9:24.

tegudon. Netiigan yu doo iya wé, enù ka anan tuu sa langun igtulù ké keniyu.

<sup>7</sup>Egoh ku migtulù keniyu sa Mepion Tegudon denu si Nemula, endà pinebayad ku duu kiyu, apiya tukééy. Dodoo, migpetukééy a polo owoy miggalebek a ma anì kumepion yu danà sa ketulù ku. Enù di ya, medaet pa iya wé binaelan ku? <sup>8</sup>Egoh ku migtulù keniyu, iya polo sa miggastu kenak sa medoo umpungan i Hésus diyà sa medoo liyu menuwa. Lagà a egpenakaw diyà kenagda enù ka ginastuwan da aken anì tabangan ku kiyu. <sup>9</sup>Egoh ku mig-ugpà diyan, apiya di pa duen sa kulang ku, endà doo egpegeni a diyà keniyu, enù ka sa medoo duma ta egpigtuu diyà Masidoniya polo sa migpeuwit diyà kenak sa kulang ku. Huenan di, endà dé migpegeni a diyà keniyu sa kehagtayan ku, owoy taman melugay endà ma dé megeni a diyà keniyu. <sup>10</sup>Tuu sa kagi i Kelistu, owoy tuu ma sa eg-ikagiyen ku diyà keniyu. Endà dé mekedan siini kepeoldòlò ku, enù ka endà dé megeni a pilak diyà etaw, iling ka kiyu ataw ka sa medoo liyu etaw diyà sa uwang Akaya. <sup>11</sup>Dodoo apiya di pa endà egpegeni a diyà keniyu, yoko egpenemdem duu endà mehidu a keniyu. Netiigan i Nemula doo tigtu eghiduan ku kiyu.

<sup>12</sup>Na, umanan ku pa sa endà kepegeni ku diyà keniyu, enù ka meked a umiling siedò medoo etaw guwaen da dò kagda gaa sa mapulù salu i Hésus. Ungayà ku endà ipeoldòlò da duu sa guwaen da dò egpegastu ké ma diyà sa etaw, lagà sa hagda egbaelan. <sup>13</sup>Beken kagda sa tigtu salu i Hésus, dodoo ubdùbò da daa. Eg-akalan da kiyu denu sa egbaelan da, owoy guwaen da dò kagda gaa sa salu sinugù i Kelistu. <sup>14</sup>Dodoo endà egkegaipan ké duu iya wé binaelan da, enù ka apiya si Satanas, egpegaling ma doo egsugùsuguen i Nemula kedu diyà langit. <sup>15</sup>Huenan di, endà ma egkegaipan ké duu sa egbaelan sa medoo etaw i Satanas ubdùbò da ma sa pineangay i Nemula egbael mepion. Dodoo mepigtamayan da doo danà sa binaelan da medaet amuk meuma sa sabuhanan agdaw.

**Ini Sa Egoh I Pabelo Migpeoldòlò  
Denu Sa Nebaelan Di**

<sup>16</sup>Na, eg-ikagiyen ku dema ini i diyà keniyu. Yoko egpenemdem duu aken sa etaw endà duen penemdem takà egpeoldòlò. Dodoo apiya di pa iya sa penemdem yu, tiggeli yu doo dinegdineg sa tukééy kepeoldòlò ku. <sup>17</sup>Na, netiigan ku beken kedu si Datù ini i eg-ikagiyen ku diyà keniyu, enù ka lagà a sa etaw endà duen

penemdem takà egpeolòlò.  
 18Dodoo, duen medoo etaw diyan egpeolòlò denu sa egbaelan da diyà tanà, huenan di egpeolòlò a ma, aken i.  
 19Enù ka kiyu, guwaen yu dò melabel sa niyu penemdem, dodoo egkeiyap yu doo egdinegdineg sa ketulù siedò medoo etaw endà duen penemdem. 20Egtigkelan yu doo amuk udipenen da kiyu. Apiya di pa egkuwa da pilak diyà keniyu ataw ka eglapisen da ma kiyu, pemaenen yu polo iya wé. Amuk egpegesen da kiyu ataw ka egtagpien da kiyu, mepion doo diyà keniyu. 21Adi-adi da pa diyà kenami, enù ka memala a umiling sa hagda egbaelan diyà keniyu guwaen yu dò tigtu mepion.

Na, amuk mebagel da egpeolòlò, mebagel a ma doo egpeolòlò, apiya lagà a sa etaw endà duen penemdem. 22Amuk egpeolòlò da danà da etaw Hudiyu, aken ma doo sa etaw Hudiyu. Amuk egpeolòlò da danà da tugod i Islaél, aken ma doo sa tugod i Islaél. Amuk egpeolòlò da danà da tugod i Ablaham, aken ma doo sa tugod i Ablaham. 23Guwaen da kagda gaa sa egsugùsuguen i Kelistu, dodoo labi pa endà egsugùsuguen di aken i. Na, netiigan ku doo lagà kagi etaw egkelengleng sa eg-ikagiyen ku enù ka egpeolòlò a ma. Uman pa dakel sa naken galebek diyà

sa hagda. Uman a pa medoo gulê nebilanggu diyà kenagda. Uman a pa medoo gulê tinapes diyà kenagda, owoy uman a pa medoo gulê buyu mematay diyà kenagda. 24Lima gulê a ma tinapes tagtelu pulù owoy siyow gulê danà sa duma ku etaw Hudiyu. 25Telu gulê a ma binalbal sa etaw tegeLoma. Segulê a ma binuung batu aní meimatayan a. Telu a ma gulê netegeban sa dakel kumpit inedaan ku, owoy mig-olul a ma diyà teliwadà dagat segeagdaw owoy segesigep. 26Egoh ku takà eg-ipanaw, medoo sa kelikutan nehaa ku. Migbatas a ma sa lawa't wayeg memahà, owoy nekesiegung a ma sa etaw tegelampas. Egkelukuyan da ma aken eg-imatay sa medoo etaw Hudiyu owoy etaw beken Hudiyu. Medoo sa kelikutan nehaa ku diyà sa dakel menuwa owoy diyà sa melabel tanà mediyù dalesan owoy diyà sa dagat ma. Pinelihay a ma sa medoo etaw ubdubò egpigtuu. 27Ini ma sa nebaelan ku. Nelíteg a ma danà sa galebek ku tigtu melikut. Medoo a ma gulê endà egpeketudug amuk sigep danà sa galebek ku. Egpeketues a owoy eglupahan a ma, owoy kulang ma sa kaenen ku owoy sa ginis ku, owoy endà ma duen sa dalesan kenà ku eg-ugpà. 28Duen ma medoo liyu kelikutan nehaa ku, dodoo endà pa egtulonen ku duu ini egoh

di. Uman agdaw tigtu a nebukul sa medoo umpungan i Hésus diyà sa langun menuwa.

**29**Amuk duen etaw egkelenek sa kepigtuu di, egkepasangan a ma enù ka dakel sa ungayà ku tumabang kenagdi. Owoy amuk duen etaw epigtuu neenggat diyà salà, tigtu egkedaet ma sa pedu ku.

**30**Na, endà meiyap a egpeolòlò hedem, dodoo amuk tegelen a, egpeolòlò a ma doo denu sa kelikutan nehaa ku anì metiigan yu endà duen sa naken egkegaga. **31**Netiigan doo i Nemula Emà i Datù Hésus endà egbutbut a egtulon ini i diyà keniyu. Na, meolò kagdi i taman melugay. **32**Na, egtulonen ku ma sa nebaelan ku dutu menuwa Damasko dò. Egoh iya, migsugù sa gubilenu hinemilì i Sulutan Alitas anì bantayan da sa bengawan sa kutà siedò menuwa anì sigkemen da aken amuk lumaun a. **33**Dodoo, duen doo etaw migtabang kenak. Dinalem da aken diyà sa amayan alat owoy tinuntun da kedu diyà sa mehagtaw tatawan sa kutà siedò menuwa. Hê, nekepelaguy a dahiya.

**Ini Sa Igpehaa I Nemula  
Diyà Si Pabelo**

**12** **1**Na, endà duen ulan sa kepeolòlò ku, dodoo lagà a daa netegel egsagbi diyà sa medoo etaw

diyan, huenan di muman a pa peolòlò. Na, egtulonen ku diyà keniyu sa igpehaa i Datù diyà kenak owoy sa igpetiig di ma diyà kenak. **2**Duen sa etaw netiigan ku epigtuu diyà si Kelistu. Egoh sepulù owoy epat gepalay, nebatun dutu siedò langit tigtu mehagtaw kenà i Nemula eg-ugpà. Endà netiigan ku duu amuk nekeuma sa lawa di dutu ataw ka sa suguy di daa sa nekehaa iya wé, enù ka si Nemula daa sa neketiig. **3**Dodoo netiigan ku doo nekeuma siini etaw dutu siedò menuwa i Nemula tigtu metolol diyà langit. Eg-ikagiyen ku dema ini i, endà netiigan ku duu amuk nekeuma sa lawa di dutu ataw ka sa suguy di daa sa nekehaa iya wé, enù ka si Nemula daa sa neketiig. **4**Egoh di eglengen dutu langit dò, dinineg di sa kagi endà egkeikagi di duu diyà sa kagi etaw daa, owoy endà ma mebaluy di ikagiyen etaw daa iya wé. **5**Na, aken iya wé etaw tinulon ku nebatun dutu langit dò, huenan di mebaluy ma amuk egpeolòlò a danà iya wé nebaelan ku. Dodoo aken, endà ipeolòlò ku duu iya wé, enù ka iya daa sa ipeolòlò ku sa medoo kelikutan nehaa ku anì metiigan yu endà duen sa naken egkegaga. **6**Apiya di pa egtulonen ku sa langun neukitan ku, endà doo lagà a sa etaw egkelengleng, enù ka anan tuu polo sa eg-ikagiyen ku.

Dodoo meked a egpeoldòlò, enù ka endà meiyap a amuk egpedakelen a etaw danà sa nehauwan ku. Ungayà ku polo egpenemdemen da aken danà sa binaelan ku hinaa da owoy danà ma sa tegudon ku dinineg da.

<sup>7</sup>Dodoo, nebegayan a sa linadu tigtu mesakit anì endà pedakelen ku duu aken danà sa tigtu mepion nehauwan ku dutu langit dò. Lagà sa egsugùsuguen i Satanas egpelihay kenak siini linadu ku, anì endà pedakelen ku duu aken. <sup>8</sup>Telu a gulê migsimbà diyà si Datù anì kedanan di siini linadu ku. <sup>9</sup>Dodoo endà kedanan di duu. Iya polo sa sagbì di diyà kenak, guwaen di, “Sumalà dé sa egkehaa ko, enget doo sa ketabang ku keniko anì metigkelan ko, enù ka mehaa sa dakel egkegaga ku danà di endà duen sa niko egkegaga.” Iya sa kagi di diyà kenak. Huenan di, tigtu egkeiyap a egpeoldòlò denu sa egoh di endà duen egkegaga ku anì metiigan etaw duen doo sa egkegaga igbegay i Kelistu diyà kenak.

<sup>10</sup>Egkeanggan a doo sumalà dé sa mehaa ku, iling ka melenek sa lawa ku, ataw ka egpeumà-umaan a etaw, ataw ka melikutan a, ataw ka mepelihay a, ataw ka memasangan a. Egkeanggan a doo danà ku egsalig diyà si Kelistu, enù ka netiigan ku amuk endà duen sa

naken egkegaga, mebagel a doo danà sa egkegaga i Kelistu diyà kenak.

**Ini Sa Egoh I Pabelo  
Egkebukul Denu Sa Medoo  
Etaw TegeKolintu**

<sup>11</sup>Na, lagà a sa etaw egkelengleng enù ka tinegel yu aken egpepeoldòlò. Uman pa mepion amuk kiyu polo sa egpedakel kenak. Apiya di pa lagà a sa etaw endà duen egkegaga, tapay a doo endà melowon sa medoo etaw diyà keniyu ubdubò da salu i Kelistu.

<sup>12</sup>Egoh ku mig-ugpà diyà keniyu egoh anay, netiigan yu doo aken sa tigtu salu i Hésus danà sa medoo binaelan ku. Tinigkelan ku sa ketulù ku keniyu, owoy igpehaa ku ma diyà keniyu sa medoo panduan binaelan ku owoy sa medoo tandà egkegaipan etaw.

<sup>13</sup>Nesetepeng doo sa langun binaelan ku diyà keniyu owoy sa binaelan ku ma diyà sa medoo liyu umpungan i Hésus. Iya daa sa kenà di neketigesà, endà egpegastu a keniyu. Amuk iya sa salà ku diyà keniyu, peuloyi yu dé diyà kenak.

<sup>14</sup>Na, buyu a dema mangay lumengen diyà keniyu sa ketelu ku dé gulê. Dodoo endà dema egpegastu a keniyu ini egoh di lagà mendaa sa egoh anay, enù ka beken pilak yu sa egkeiyapan ku, dodoo iya polo sa egkeiyapan ku sa kehidu yu

kenak. Taa yu, hih. Beken batà sa gumastu sa lukes di, dodoo lukes polo sa gumastu sa anak da, owoy lagà a sa emà yu danà ku egtulù keniyu. **15**Huenan di, meanggan a doo amuk mekebegay ku sa medoo langun taman ku owoy sa langun egkegaga ku ma anì tabangan ku kiyu. Dodoo apiya di pa tigtu eghiduwan ku kiyu, lagà doo alang-alang sa niyu kehidu kenak.

**16**Netiigan yu doo endà duen sa egpegeniyen ku diyà keniyu, dodoo duen kéen etaw diyan guwaen da dò inakalan ku gaa kiyu owoy linapis ku ma kiyu. **17**Amuk hediya, ngadan sa ukit ku eglapis keniyu? Egoh ku migpeangay sa duma ku diyan, endà ma duen sa nekuwa ku diyà keniyu. **18**Pineangay ku Tito i diyà keniyu owoy pineunut ku ma diyà kenagdi sa duma ta epgigtuu. Enù di ya, inakalan i Tito pa kiyu? Endà meikagi yu duu inakalan di kiyu, enù ka nesetepeng doo sa egbaelan ké si Tito danà sa pedu ké nesesebaen.

**19**Na, iya sa penemdem yu kéen migsulat ké ini i anì ipetiig ké diyà keniyu sa egoh ké endà duen salà. Dodoo, beken iya wé, enù ka netiigan i Nemula doo eg-ikagi ké daa ini i diyà keniyu danà ké nesesebaen si Kelistu. O medoo duma ku eghiduwan ku, igsulat ké langun ini i anì kumeeles sa kepigtuu yu.

**20**Egkebukul a amuk hauwen ku sa adat yu endà meiyapan ku duu amuk tumbow a diyan.

Agulé, dumuen ma sa baelan ku diyà keniyu endà ma meiyapan yu duu, enù ka bulitan ku kiyu. Egkebukul a ma amuk hauwen ku kiyu egkesesigbolow ataw ka egkesina yu, ataw ka melemu yu melangget, ataw ka penemdem yu sa niyu daa pedu, ataw ka egsumbung yu owoy ngolomen yu sa endà tuu, ataw ka egpedakelen yu kiyu i, owoy takà yu mogo etaw.

**21**Egkebukul a ma amuk tumbow a diyan, memala a diyà si Nemula danà sa egbaelan yu medaet apiya di pa metudà doo sa ketulù ku keniyu egoh anay. Tigtu a mebukul amuk duen etaw diyà keniyu endà pa eg-ekedan da duu sa salà egbaelan da egoh anay, upama egbigà da ataw ka egkeseuma da lawa sa etaw beken sawa da ataw ka endà egkemalaan da sa medaet egbaelan da.

#### Ini Sa Medoo Isasà I Pabelo Diyà Kenagda

**13** **1**Na, ini dé sa ketelu ku gulê eg-angay diyà keniyu. Amuk duen etaw egtipu sa duma di epgigtuu, mepion doo amuk egpangunutan ké sa uledin igpesulat i Nemula, guwaen di, “Endà mepigtamayan di sa etaw amuk endà duen duwa etaw ataw ka



telu egpetuu sa itipu kenagdi.”<sup>i</sup>  
 2Na, egoh ku endà pa diyan, eg-ikagi a dema sa inikagi ku egoh anay egoh sa keduwa ku gulê miglengen diyà keniyu, guwaen ku, “Amuk endà eg-ekedan yu duu sa medaet adat yu, tigtu pigtamayan ku sa etaw egbael salà taman sa langun kedoo yu amuk pelikù a dema.” 3Na, amuk pigtamayan ku kiyu, metiigan yu doo danà i Kelistu iya wé inikagi ku diyà keniyu. Endà melenek Kelistu i, dodoo ipehaa di polo sa dakel egkegaga di amuk duen sa baelan di diyà keniyu. 4Apiya di pa lagà endà duen egkegaga di egoh di igtutuk diyà sa kayu igbugsud, neenaw doo owoy melalù ma taman melugay danà sa tunung i Nemula. Hediya ma kami i, lagà ké ma endà duen egkegaga danà ké nesesebaen si Kelistu. Dodoo danà sa tunung i Nemula egtabang kenami, melalù ké ma doo lagà kenagdi owoy duen ma egkegaga ké epgigtamay keniyu.

5Na, tepengi yu sa pedu yu anì metiigan yu amuk tuu sa kepigtuu yu, ataw ka endà. Netiigan yu doo eg-ugpà Hésus Kelistu i diyà sa pedu sa etaw epgigtuu. Huenan di, amuk endà diyà di keniyu, netiigan ta

doo beken kiyu sa etaw di. 6Dodoo ungayà ku metiigan yu kami sa tigtu salu di. 7Na, isimbà ké kiyu diyà si Nemula anì endà dé egbael yu sa medaet. Beken iya daa sa ungayà ké metiigan etaw egpangunut yu diyà sa igtulù ké keniyu, dodoo ungayà ké polo baelan yu daa sa langun mepion. Amuk hediya, maen dé amuk endà duen etaw neketiig kami sa binegayan i Kelistu egkegaga anì migtamay ké keniyu. 8Amuk tumbow ké diyan, munut ké doo diyà sa tuu tegudon denu sa langun egbaelan ké diyà keniyu, enù ka endà mebaluy di metipay ké iya wé. 9Apiya di pa endà mehaa sa egkegaga ké migtamay keniyu, egkeanggan ké doo amuk meudes yu egpangunut diyà sa mepion adat. Huenan di, takà ké kiyu isimbà anì tigtu kumetiengaw sa adat yu. 10Egsulat a ini i diyà keniyu egoh ku endà pa mangay diyan, anì pepionen yu sa adat yu anì endà ma duen pesuwan ku egpehaa sa egkegaga ku migtamay keniyu amuk tumbow a diyan. Beken iya sa pesuwan i Datù migbegay kenak egkegaga anì pedaet a sa kepigtuu yu, dodoo binegayan a

<sup>i</sup> 13:1 Basa ko Dutilonomiyu 19:15.

daa anì tumabang a sa kepigtuu yu.

**Ini Sa Sabuhanan Kagi I Pabelo**

11Na, o medoo дума ku epgigtuu, taman ini daa sa kagi ku diyà keniyu. Pepion yu sa adat yu, owoy pangunuti yu dé sa igsugù ku keniyu. Sesebaen yu ma sa pedu yu anì kumelanih sa keugpà yu. Amuk hediya, takà eg-ugpà diyà keniyu Nemula i, sa keduwan sa melanih pedu owoy sa kehidu.

12Na, amuk mesetipon yu, kiyu i etaw epgigtuu, pehauwi yu sa kesehiduway yu<sup>j</sup>

13Na, ipetulon sa langun etaw epgigtuu dahini sa mepion pedu da diyà keniyu.

14Na, egsimbà a anì mekehaa yu langun sa mepion ketabang ipeuloy i Datù Hésus Kelistu, owoy mehiduwan yu i Nemula, owoy mesesebaen yu ma danà sa Metiengaw Suguy i Nemula eg-ugpà diyà keniyu.

Na, taman iya daa sa kagi ku.  
Si Pabelo

---

<sup>j</sup> 13:12 Mebaluy ma guwaen di, “Ingadeki yu sa medoo дума yu epgigtuu danà sa kehidu yu kenagda.”